

Filipai

Filipai niŋ Yesuyen alya bereya hitte Pol beleŋ asaŋ kayyiŋ

1 ¹Ne Polbe Timotiya dufay unŋkuren po kerdeb deŋ Filipai taunde niŋ Al Kurunyen alya bereya, Yesu Kristuya haŋ mar goyen goke asaŋ gago kaŋ duneŋ hime. Irde deŋ Yesu Kristuyen alya bereyat doyaŋ marya faraŋ durd durd marya niŋ wor asaŋ gago kaŋ hime. Deyyabe Yesu Kristuyen metenŋ mar. ²Niŋgeb Nanniniŋ Al Kurunya Doyaŋ Al Kurun Yesu Kristuya beleŋ bunineŋ dirde igiŋ igiŋ dirde bitiŋ yisikamke igiŋ hiwoŋ yeŋ nurde har.

³Be, nebe deŋ ge dufay henyaŋe hugineŋ deŋ ge teŋ Al Kurun igiŋ nurde uneŋ himyen. ⁴⁻⁵Deŋbe haŋkapyu Yesu niŋ yitiŋ mere igiŋ goyen nuraminde mat mere igiŋ goyen tagal tagal meteneŋ gayen faraŋ nurkeb waŋ waŋ gayenter manaŋ faraŋ nurde haŋ. Niŋgeb Al Kurun mere irde henyaŋe deŋ beleŋ faraŋ nurde haŋyen goke hugineŋ amaŋeŋ nurde himyen. ⁶Niŋgeb metenŋ igiŋ goyen Al Kurun beleŋ deŋ hitte miŋ uryiŋ gobe gwahade po metenŋ teŋ hike kuŋ kuŋ Yesu Kristu wayyeŋ nalure gab pasi iryeŋ gobe fudinde wor po yeŋ nurde hime.

⁷Ne beleŋ deŋ ge gwahade nurde duneŋ hime gobe bener mat wor po deŋ ge amaŋeŋ nurde hime geb, gago buluŋ tihim yeŋ ma nurde hime. Deŋbe ne beleŋ Yesu niŋ yitiŋ mere igiŋ goyen al beleŋ daha buluŋ irnak yeŋ pet teŋ saŋiŋ irde hinhemyabe faraŋ nurde hinhan. Irde gayenter mere igiŋ goke teŋ koyare himeya wor faraŋ nurd nurd niŋ det yad yerke waŋ haŋyen. Niŋgeb ne gahade gare Al Kurunyen metenŋ titek moŋ goyen metenmiŋ teŋ himeke faraŋ nurde haŋ gobe deŋ goyen neya tumŋaŋ gar heŋ metenŋ teŋ hite yara nurde hime. ⁸Niŋgeb deŋ gwaha nirde haŋ mar goyen kuŋ dentek wor po nirde hi, irde Yesu Kristu beleŋ deŋ ge amaŋeŋ nurde duneŋ hi gwahade goyen po, ne manaŋ deŋ ge amaŋeŋ nurde duneŋ hime. Dufay gwahade heŋ hime gobe Al Kurun wor fudinde yeŋ nurde hi.

⁹Be, nebe deŋ ge teŋ Al Kurun gahade gusuŋaŋ irde himyen: kadtiŋ ge amaŋeŋ nurde yuneŋ yuneŋ matabe kurun hiyyeŋ. Irde gwaha teŋ

henyabe mere fudinde bebak ten ten goya mata iginya bulunya yenen bebak ten tenya goyen wor Al Kurun belen taren irwon yen gusunjan irde himyen. ¹⁰Gogab Al Kurun dilingde mata igin wor po goyen po ten hinayin. Gwaha tenbe Yesu Kristu wan wan nalurebe mata buluntin minmon, ultinde merem mon wor po hinayin. ¹¹Be, den ge Al Kurun gusunjan irde himyen kurabe Yesu Kristu belen faran durkeb mata igin budam po ten hinayin yen goke gusunjan irde himyen. Gogab al belen matatin yenenbe Al Kurun denem turnun yan irde isoka irde hinayin.

Yesu nin po nurde ga hitek

¹²Be, kadne yago, Yesu nin yitin mere igin goyen tagalde himeke igin ma nurde hanjen mar belen nad koyare neran hime gago. Goyenbe mere igin gobe kurun hen kun hikeb al budam nurde han. ¹³Ningeb Roma gabman doyan al kurunyen ya kurun doyan ird ird mar tumnan, irde gar nin al hoyan budam wor ne nin yenbe, “Yenbe Yesu Kristuyen meten al geb, koyare hi gogo,” yen nurde han. ¹⁴Irde nebe koyare hime gake kadne yago belen han kapyabe kanduknen nurde hinhan. Gega gayenterbe koyare hime gate iginen forok yeke yenenbe Doyan Al Kurun nin bin hek wor po irde han. Irdeb taren hen sabamin tagal tagal nin kafura ma henbe kawan po al momon yirde tukun han.

¹⁵Fudinde, al kurabe ne belen Yesu Kristuyen mere tagalde himekeb denne kurun hen hi goyen nenenbe dani nen gwahade mon yen nurde daha mat kura fole irnin yen nurdeya Yesuyen mere tagalde han. Munan kurabe fudinde wor po, dufay igin kerdeya meten go ten han. ¹⁶Dufay igin kerde meten ten han mar gobe Yesu nin yitin mere igin goyen al belen daha bulun irnayin yenbe mere igin goyen sanjin ird ird meten goyen Al Kurun belen ne nuntin yen nurde han geb, ne nin amanen nurdeb mere igin goyen tagalde tukun han. ¹⁷Gega kurabe binde dufay bulun kerdeya Yesu Kristu nin tagalde han. Go mar gobe yingen ge po nurde tagalde han. Irde dufaymindebe, “Yesu nin tagalteke gab goke igin ma nurde han mar belen Pol koyare hi goyen bulun bulun irnayin,” yen nurdeb gogo tagalde han. ¹⁸Goyenpoga Yesu Kristuyen merebe kurun hen kun hi. Dufay igin mat, ma bulun mat wet kura goyenbe, Yesu nin yitin mere iginbe kurun hen kun hi. Ningeb daha yewen? Nebe goke igin wor po nurde hime. Irdeb kame wor gwahade po amanen nurde hen. ¹⁹Ga yen hime gabe den belen Al Kurun gusunjan irde hike Holi Spirit belen faran nurke koyare hime gayen sinare kwen yen nurde hime geb, gago huginen amanen nurde henya dinen hime. ²⁰Nebe Al Kurun belen meten nuntin goyen son ma hemewon, irde meten igin po timewon wor po yen nurde himyen. Irde taren po hen meten tenbe gor mat Yesu Kristu denem turnun yan irde hinhem gwahade po, gayenter wor gwahade goyen po ten hen. Kamen, ma hen goyenbe gwaha po ten hen. ²¹Goyenbe

daniñ geb megen gar hime? Gobe Yesu Kristu niñ po teñ megen gar hime. Munañ kamenj wor wor gobe yenya hireñ geb, goke igiñ wor po yenj nurde hime. ²²Goyenbe go ma kamde megen gar heñ yenj ge meten teñ himeke gote iginenj forok yenayin goyen wor igiñ wor po. Ningeb daminbe igiñ yewen? Heñ heñ wet kura ma kamde kamde wet kura? Neb go ma nurde hime. ²³Nebe dufay irawa gayen kahalte hime. Dufaynerbe kamde dubul teñ Yesu Kristu hitte kunj yenya heñ heñ gobe igiñ wor po yenj nurde hime. Gobe duliñ megen gar heñ heñ gote folek. ²⁴Goyenpoga denj ge teñ megen gar heñ farañ durd durd goyen wor det kurun wor po yenj nurde hime. ²⁵Nebe fudinde gwahade po yenj nurde hime geb, denya hitek yenj nurde hime. Gogab denya heñ farañ durmeke Yesu niñ hekken nurd nurd matatinj gobe sanij heñ kurun heñ hiyen. Irde yenj ge hekken nurde heñyabe aman dufay manañ bitin bana forok yenj hiyen. ²⁶Ningeb ne gayen sopte denj hitte kumeke nenenbe Yesu Kristuya heñ aman heñ hanjen gobe sopte kurun wor po hiyen.

²⁷Be, denbe mata igiñ, Yesu Kristuyen mere igiñ belen yitin goyen po teñ hinayin. Gogab kunj denen ma gar po yar kura heñ goyenbe dufaytinde metenminj teñ teñ goyen tareñ po kerde hanj gote mere momon nuren. Irde Yesu niñ yitin mere igiñ goyen al belen nurde yenj ge dufaymin sanij ird ird niñ meten titek yenj gabu irde meten teñ hinayin mere momoninj wor nuren. ²⁸Irdeb asogo dirde hanj mar goke kafura ma heñ hinayin. Asogo dirde hanj mar gobe denj belen yenj ge kafura ma heñ hike denenbe denj belen yenj fole yirtin goyen bebak tinayin. Fole yirtek tareñ dunyen albe Al Kurun ningeb, gogo denj belen mel goyen fole yirnayin. ²⁹Al Kurunbe Yesu Kristu niñ dufaytin tareñ ird ird mata po ma dunyin. Yenj ge teñ kanduk yenen yenen manañ dunyin. Det irawa gabe al mali yawartek mon, Al Kurun belen basa yirtin mar po ga yawarde hanjen. ³⁰Be, hanja kanduk yade hanj gobe hakot ne ulner forok yeke yenen hinhan go gwahade goyen yade hanj. Irdeb hanja manañ kanduk go bana po hime goyen gote mere momonne wor nurde hanj gogo.

Yesu Kristuyen mata gama irde hinayin

2 ¹Be, Yesu Kristuya heñ heñ gore kura denj goyen sanij heñ heñ niñ farañ durde hi? Irdeb yenj belen denj goyen bubulkunne wor po yenj nurd dunen hi gore kura bitin yurum irde hi? Irdeb Holi Spiritya kura heñ awalik heñ hanj? Irde kadtin ge buninenj nurde igiñ igiñ yird yird dufay kura heñ hanj? ²Be, gwaha teñ hanj kenem dufaytinja bitinja unkenen po irde hinayin. Gwaha teñ hinayinbe goke amanen wor po nuren. ³Be, meten kura tinin yenbe dufaytinde dindiken ge po nurde al belen turun dirnan yenj ma meten teñ hinayin. Gwaha titnenbe nen nurhet nurhet mata go tubul tenbe dindiken bande yird yird mata teñ hinayin. ⁴Irde denj dunkenen dunkenen goyen dindiken ge po nurd

nurd mata ma tej hinayinj. Kadtiŋ ge wor nurde faranj yurde hinayinj. ⁵Matatiŋbe Yesu Kristuyen mata yara wor po tej hinayinj. ⁶Yenbe Al Kurunja tunjande gega, dufaymindebe, “Nebe Al Kurunja tunjande geb, yen hi gwahade po ne wor denne turŋuŋ yaŋ hewen,” yen ma nuriŋ. ⁷Gwaha titŋenbe denem turŋuŋ yaŋ goyen tubul tenbe meten al denem mon yara hiriŋ. Niŋgeb yenbe al hen kawan henbe matamin, dufayminja mereminja tumŋaŋ al belen tej hanjen goyen tej hinhin. ⁸Gega ne nurhem nurhem mata ma tenbe Al Kurun belen gwaha tiyayinj inyiŋ go po nurde gama irde kuŋ kuŋbe kamde kamde wor kinyiŋ. Goyenbe kuruse hende kamde kamde goyen wor Al Kurunyen dufay geb, go po gama iryiŋ. ⁹Goke tenbe Al Kurun belen denem yaŋ wor po irdeb det kurun gayenbe yen yufuk bana po yiryiŋ. ¹⁰Niŋgeb al ma det nanŋkindeya megen gar niŋyabe megen binde niŋya gore tumŋaŋ Yesu turun irniŋ yenbe urgun kaŋ dokolhon yugulun tej turun irde hinayinj. ¹¹Irdeb kawan po Yesu Kristube Doyan Al Kurun yen hinayinj. Irdeb matamin gokeb Nanin Al Kurun denem turŋuŋ yaŋ irnayinj.

Mata igiŋ al belen gama irtek po tej hinayinj

¹²Niŋgeb kadne yago, Al Kurunyen mere kenkela gama irde hinayinj. Denbe hakot neya tumŋaŋ hinhetyabe Al Kurunyen mere kenkela gama irde hinhan. Niŋgeb gayenter neya tumŋaŋ ma hite gega, Al Kurunyen merebe gama po irde hinayinj. Gobe det kurun wor po geb. Al Kurun belen bikken dumulgaŋ tiyiŋ geb, den tumŋaŋ Al Kurun kafura irde palap irde henja mata igiŋ tej tej niŋ kurut yen hinayinj. Irkeb kamebe dawaryen. ¹³Al Kurunbe mata igiŋ yen belen amanen nurde hi goyen goke bitiŋ huwarke wilakŋen nurde tej hinayinj yen denja hen huginen meten tej hi. Den belen igiŋ gwaha tej hitek tarenbe yen belen dunen hi.

¹⁴Irdeb det kura yirde haŋ goke kadom mohonde tej ŋagak ma yen hinayinj. ¹⁵Al Kurun dirŋen wenbe bulun kura ma tej hanjen. Niŋgeb den wor uliŋde merem mon hen dufay bulun minmon hinayinj. Denbe megen niŋ mar dufaymin bulun, irde matamin wor bulun goyen kahal bana haŋ gega, uliŋde merem mon, irde dufay bulunŋin minmon hinayinbe dinambe belen wawun melak hen nanŋkinde agat urde hanjen go gwahade goyen yirde hinayinj. ¹⁶Gwaha tej henbe Al Kurunja huginen hen hen mere goyen sanj po tanarde hinayinj. Gogab ne gayen Yesu Kristu waŋ waŋ nalure goyen den ge meten tej hinhem goyen duldul ma meten timiriŋ, iginen yaŋ hiriŋ yen nurdeb goke aman hewen.

¹⁷Be, den belen Yesu Kristu niŋ dufaytin taren irde haŋ gobe dapŋa gasa yirde Al Kurun galak irde doloŋ irde hanjen go gwahade goyen. Niŋgeb den mata go tej haŋ goyen taren wor po hen hen ge tej igiŋ aman hende kamen yen nurde hime. Gobe dapŋa gasa yirde Al Kurun galak yirtiŋ go hende

wain wogortij go gwahade goyen. Ningeb den ge ten kamen goke amanen nurde hime. Den wor Al Kurunya awalikde han goke aman hen hinayij.
 18 Ningeb den wor goke amanen nurnayij, irde neya tumnan aman hetek.

Timoti Filipai taunde ten kerke kun kun nin yirij

19 Be, Timoti gayen aranen mun kura ten kermeke den hitte kun kun gobe Doyan Al Kurunyen dufay kenem aranen ten kermeke kuwon yen nurde hime. Gogab mulgan hen wan dende mere momon kura momon nirkeb aman hewen. 20 Al kura yen yara ma hi. Yen mun po gab bener dahade nurde hime goyen kenkela nurde hiyen. Irde binde mat wor po den ge nurde faran durd durd nin po nurde hiyen. 21 Al hoyan kurun gabe yingen ge po nurdeb Yesu Kristu nin ma nurde hanjen. 22 Gega denbe Timotiyen mata iginbe gwahade yen nurde han gogo. Yenna neyabe ire naniyja belej meten titnen ten Yesu nin yitij mere igin goyen goke meten ten haryen. 23 Ningeb dufaynerbe Timotibe aran po ten kermeke den hitte kuwon yen nurde hime. Goyenpoga mata dahade ne hitte forok yiyyen goyen bebak ten gabe ten kermeke kuyen yen nurde hime. 24 Irdeb Doyan Al Kurun belej ne gayen aran po den hitte kun kun belej goyen fudinde wor po kerd nunyen yen nurde hime.

Epafroditus ten kerke kun kun nin yirij

25 Goyenbe Timoti gayen gor ma kun hikeyabe dufaynerbe Epafroditus ten kermeke mulgan hen den hitte kuyen gabe igin yen nurde hime. Yenbe kolne yara irde meten kadne wor po. Yenbe ne gayen Yesu nin ten Satanya fuleja ten ten al himirin gwahade goyen po, yen wor Yesuyen fuleja al hirij. Irde det nin amu hen himyen goyen faran nurde damu ten nunen nunen nin den belej hulyan irke wanbe faran nurde hiyen. 26 Yenbe den tumnan goyen denmewon yen nurde hi. Irdeb garbam bulun wor po heke mere momonmin nuran goke kanduknen wor po nurde hi. 27 Fudinde wor po, yenbe garbam kurun hen son kamun. Gega Al Kurun belej bunijen irun. Irde ne nin yen, “Monjo Epafroditus kamkeb bin misij kurun katyen,” yenbe bunijen nirun geb, gogo sope irke igin hiyun. 28 Ningeb goke tenbe aranen po ten kermeke den hitte kukeb sopte kenenbe aman henayij. Irkeb ne wor bene misij kurun ma katen. 29 Ningeb Epafroditus gayen Doyan Al Kurunyen aman matare gargar irde igin igin irde hinayij. Irdeb al hoyan kura Epafroditus gahade gayen wor yenenbe gargar yirde hinayij. 30 Yenbe Yesu Kristuyen meten ten henya son kamun. Dindiken hantinde faran nurtek gob metenen geb yen hulyan irke wanbe faran nurde henya gogo son kamun. Ningeb palap irde hinayij yenbe gago dinen hime.

Ulnininde mata ten ten nin ma hekken nurde hitek

3 1 Be, kadne yago, merene pasi iren tihim. Nebe mere min unjukan hankepaya momon dirmirin goyen po sopte kan dunen dunen ge

kanduknejen ma nurde hime. Gogab gorebe den goyen faran durde det kura bulun dirtek goke pet dirde hiyen. Momon diren tihim gobe gahade: Doyan Al Kurunya hen aman hen hinayin. ²Irde mel Yuda mar kura gore guba mata nin tagalde han goke kenkela hen ga hinayin. Go mar gobe kulu duwi yara geb matamin gore bulun dirnayin. ³Fudinde wor po, Al Kurun dilinde guba yen yen mata fudindere kutin marbe nen gago, yen mon. Nende guba yen yen matabe Holi Spirityen saninde Al Kurun dolon irde hityen, irde Yesu Kristuya hen aman hen hityen gogo. Nenbe ulnininde guba yen yen mata gore mun kura igin diryen yen ma nurde hime.

⁴Fudinde, bikkenbe ne belen ulninin sope irde wukken hen hen mata goyen goke hekken nurtek gote minbe budam wor po hinhan. Ningeb al kura belen, “Nebe min gwahade geb, ulin sope ird ird mata goke hekken nurde hime,” yiyyen al gobe epte ma fole niryen. ⁵Nebe kawan hen naja fay 8 hemekeb Yuda marte mata gama irde guba yen nunamin. Nebe Israel mar al bin tolak wor po, irde Benyaminyen minde mat watin. Mamneya nanneyabe Hiburu mar wor po, hoyan mun kura mon. Irdeb Moseyen saba goyen kenkela gama ird ird nin tenbe Farisi mar al himirin. ⁶Irdeb hakotbe Yuda marte tikula goke amanejen wor po nurde hinhem geb, Yesuyen alya bereya sios goyen daha wor hubu hewon yen nurde bulun bulun yirde hinhem. Nebe Moseyen saba gama irde al huwak hen hen mata kurun gobe kenkela po gama irde hinhem. Kura mun son ma hen hinhem. ⁷Goyenpoga igin niryen yen nurde hinhem mata kurun goyen Yesu Kristu nin tenbe min minmon wor po yen nurdeb yubul po timirin. Gayenter wor gwahade po nurdeb gwaha ten hime. ⁸Irde Doyan Al Kurune Yesu Kristuya kadam nurd gunen ten awalikde hen hen gobe det kurun wor po geb, det hoyan kurun gobe min minmon nirde hiyen. Ningeb yen ge tenbe det hoyan kurun gobe yemeyde pasi himirin. Det hoyan kurun gobe neban yen yenen himyen. ⁹Gogab Yesu Kristube nere hiyyen, irde yenya awalikde hiren yen nurde himyen. Nigenbe Moseyen saba kenkela gama irde al huwak hen hen gobe tubul timirin. Irdeb Yesu Kristu nin dufayne taren irde himere matbe Al Kurun dilinde huwak hen hen belen gama irde hime. Al Kurun dilinde al huwak hen hen gokeb Yesu nin dufayninin taren irde hityen geb, gogo al huwak yen denen hiyen. ¹⁰Nebe Yesu Kristuya kadam nurd gunen ten awalikde hirewon, irde Al Kurun belen Yesu kamke isan hiri gote sanjen goyen nigen wor nurmewon yen nurde hime. Irdeb yen kanduk yenen hinhin gwahade goyen ne manan yenen himewon, irde yen belen alyen mata bulun goke kamyin gwahade goyen po, ne wor mata bulun ulner han gayen pasi yirmewon yen nurde hime. ¹¹Gwaha ten gabe Yesu kamyinde mat huwaryin gwahade goyen po, ne wor gwaha timewon yen nurde hime.

Murungem igiñ tej tej niñ kurut yeñ hitek

¹²Be, mata goke yeñ hime kurun gobe bikkeñ yawarmiñ yeñ ma yeñ hime. Irde mun kura bulunem mon, igiñ po hime yeñ ma yeñ hime. Goyenpoga Yesu Kristube ne beleñ yenya awalik wor po heñ heñ niñ kurut yeñ hime gate murungem gunen yeñbe bikkeñ basina niryiñ geb, murungem goyen temewon yeñ kurut wor po yeñ hime gago. ¹³Goyenbe, kadne yago, nigenbe murungem goyen tumñan yade pasi himiñ yeñ ma nurde hime. Gwaha titñenbe det harhokne beleñ hañ goke ma nurde heñbe det kame wanayiñ goyen yawarmewon yeñ kurut wor po yeñ hime. ¹⁴Ningeb Yesu Kristuya awalikde heñ gama ird ird mata gote murungem Al Kurun beleñ nunen yeñ basina niryiñ geb, murungem goyen yawaren yeñ Yesu Kristuya awalikde heñ gama ird ird niñ kurut wor po yeñ hime. Kup yeñ yeñ karire kup yeñ hañ marte mata yara, teñne ilhal tej dufayne unjkuren po irde kurut yeñ hime.

¹⁵Goyenbe gwaha tej tej gobe ne po mon. Neñ Yesu gama ird ird matare parguwak yara hitiñ marbe tumñan mata goyen tej hitek. Munan deñ hañ bana goyen al kura dufay gwahade ma kerde hañ kenem go mar goyen wor Al Kurun beleñ dufaymiñ wuk yirkeb bebak tinayiñ. ¹⁶Goyenbe neñbe mere fudinde hañkapy titiriñ geb, go po tanarde gama irde hitek.

¹⁷Ningeb, kadne yago, deñbe ne mata tej himyen gwahade goyen po gama nirde hinayiñ. Irdeb deñ gama irde hitek mata kura neñ beleñ dikala dirtiriñ goyen al kura gama irde hike yenenbe deñ wor gwahade po tej hinayiñ. ¹⁸Ga dinen hime gabe al budam mata bulun tej hañ goreb Yesu Kristu kuruse hende kamiñ goyen asogo irde hañ geb, gago momon dirde hime. Mere gabe hugiñen momon dirde hinhem goyen gago sopte delne fimiñ manan dinen hime. ¹⁹Be, Yesu Kristu asogo irde hañ mar gote al kurunminbe binje, irde mata kura memyak nurtek goyen igiñ tihit yeñ parpar tej hañ, irde dufayminbe megen gar niñ mata bulun niñ po nurde hañ. Ningeb gwahade mar gobe kun kun funanbe kak alare po kunayiñ. ²⁰Goyenpoga neñbe Al Kurunyen gasunde niñ alya bereya. Irde Doyan Al Kurun Yesu Kristu, Dumulgan tej tej Alniniñ beleñ Al Kurun hiyende mat wan wan niñ po doyan heñ hite. ²¹Yeñ beleñ katenbe uliñ turun yan wor po hitiñ gwahade po, tarenminde nende ulniniñ sanin minmon gayen wor yende yara sanin yiryen. Gwaha yiryen tarenmin gobe megenya nankinya irde det kurun gayen yingen yufukde yerde doyan yirde hi gote tarenje yiryen.

Neñbe awalikde heñ aman heñbe dufay igiñ po tej hitek

4 ¹Ningeb, kadne yago, deñ ge amanen wor po nurde dunen hime, irde kun denmewon wor po yeñ nurde hime. Deñ niñ nurde heñbe

bener mat aman dufay po forok yeq hiyen. Irdeb Al Kurun niŋ meteq teŋ himyen gote muruŋgembe deŋ gogo yeq nurde himyen. Niŋgeb Doyaq Al Kurunya heŋ saŋiŋ haŋyen gwahade po saŋiŋ wor po heŋ ga hinayin.

²Be, Yuodiaya Sintikeya, derbe merene ga nuryi ko. Derbe Doyaq Al Kurunya heŋ ire babamya wor po hitiŋ har. Niŋgeb der uliŋ kadam mohonde teŋ hoyaq hoyaq ma hiriryen, awalikde po hiriryen. ³Irde deŋ Yesu niŋ nurde meteqne faraq nurde haŋyen mar manaq bere irawa goyen ne beleŋ yinheŋ gwahade po teŋ hiriryen yeq faraq yurnayin. Hakotbe bere irawa gob neya Yesu niŋ yitiŋ mere igiŋ goyen tagal tagal niŋ meteq kurun wor po teŋ hinhet. Irem gobe Klemenya meteq kadne hoyaq yagoya manaq dufaymiŋ gabu irde meteq teŋ hinhan. Meteq kadne yago niŋ yihim gobe Al Kurunya hugiŋen heŋ heŋ bana haŋ geb, yende deŋembe Al Kurunya hugiŋen hitek marte deŋem katiŋ asaŋde haŋ.

⁴Be, deŋbe Doyaq Al Kurunya heŋbe amaqen wor po nurde hinayin. Irde sopte po diŋen hime. Amaŋen wor po nurde hinayin.

⁵Irdeb bekkeŋde igiŋ mat al mere yirde hinayin. Irdeb al hoyaq beleŋ gwahade po dennayin. Be, Doyaq Al Kurun watek nalube binde hihi.

⁶Niŋgeb kanduk kura yeneŋ haŋ goke galgalen ma nurde hinayin. Gwaha titenbe det kurun nurdeb det goke Al Kurun mere irde gusuŋaq irde hinayin. Irdeb gusuŋaq irde heŋyabe wol heŋ dunyen go yeq nurdeb hugiŋen igiŋ nurd uneŋ hinayin. ⁷Irdeb Al Kurunya biŋ kamke igiŋ heŋ heŋ mata al beleŋ bebak titek moŋ wor po gore deŋ Yesu Kristuya haŋ mar gote bitiŋya dufaytiŋya doyaŋ yirde pet yirde hikeb al bulun beleŋ epte ma bulun diriŋen.

⁸Be, kadne yago, merene gayen pasi ird ird niŋbe gaha diŋen: deŋbe Al Kurun beleŋ turun dirtek mata igiŋ teŋ teŋ niŋ dufay heŋ hinayin. Niŋgeb mere fudinde teŋ teŋya al beleŋ gama yirtek mata igiŋ teŋ teŋya niŋ po dufay heŋ hinayin. Mata huwakya mata wukkekyabe al beleŋ yeneŋ turun dirtek mataya goke po dufay heŋ hinayin. Irdeb kadtiŋ ge amaqen nurd yunen yunen mata goke wor dufay heŋ hinayin. ⁹Irdeb saba dirmeke nuramiŋ irde kurabe mata dikala dirmeke yeneŋ bebak tiyamiŋ kurun gobe dufaytiŋde po ma hiyen. Sabaya mataya ne hitte mat yawaramiŋ goyen gama yirde tuŋaq yurde hinayin. Irdeb Al Kurun biŋ kamke igiŋ heŋ heŋ mata gote miŋ al gore deŋya hiyen.

Filipai mar beleŋ Pol faraq uramiŋ goke amaqen nurde yunyiŋ

¹⁰Be, deŋ beleŋ faraq nuramiŋ, irdeb waŋ waŋ gayenter wor sopte faraq nuraŋ. Niŋgeb Doyaq Al Kurun beleŋ goke amaqen nurde hi gwahade po ne manaq amaqen nurde hime. Fudinde deŋbe faraq nurd nurd niŋ dufay heŋ hinhan gega, meteqen dirde hinhan. Goyenbe faraq nurtek beleŋ keneŋbe gogo faraq nuraŋ. ¹¹Mere ga diŋen hime gabe det kura niŋ amu wor po heŋ ga ma diŋen hime. Nebe mata kurayen

kurayen, igiŋya buluŋya ne hitte forok yeŋ hike go bana heŋ bene kamke igiŋ heŋ heŋ goyen keneŋ keneŋbe kerd nuntiŋ hime. ¹²Nebe det niŋ amu heŋ heŋ bana hinhem geb, gwahade heŋ heŋ matabe nurde hime. Irde kurabe det budamne yaŋ heŋ hinhem geb, gwahade heŋ heŋ gobe dahade goyen wor nurde hime. Nebe mata irawa goyen bana heŋya bene kamke igiŋ heŋ heŋ belneŋ al beleŋ keneŋ bebak ma teŋ haŋyen goyen bebak teŋ hinhem. Niŋgeb mata dahade ne hitte forok yenayiŋ gore epte ma ingogaha nirnayiŋ. Biŋge ep nene bene maŋiŋ hiyyeŋ ma biŋge kameŋ, irde detne budam miŋyaŋ heŋ ma siksukneŋ heŋ gobe tumŋaŋ igiŋ ala yeŋ nurde hime. ¹³Nebe al gwahade geb, Yesu Kristu beleŋ tareŋ nirkeb ne hitte mata forok yeŋ hinayiŋ kuruŋ goyen igiŋ fole yirde heŋ.

¹⁴Ne beleŋ gwaha dineŋ hime gega, ne kanduk yeneŋ himeke neneŋbe faranŋ nuraŋ gobe igiŋ wor po yeŋ nurde hime. ¹⁵Haŋkapy a ne beleŋ gor kuŋ Yesu niŋ yitiŋ mere igiŋ tagaldeb Masedonia naŋa tubul teŋ hoyande kumiriŋ goya goyenbe Yesuyen alya bereya hoyande niŋ beleŋ kura faranŋ ma nuramiŋ. Deŋ Filipai niŋ Yesuyen alya bereya gore po ga faranŋ nuramiŋ gobe dindikeŋ nurde haŋ gogo. ¹⁶Irdeb Tesalonaika taunde hinhemya wor det niŋ nurde hi yeŋ nurdeb faranŋ urniŋ yeŋbe ne niŋ det yad yerke wayamiŋ. Goyenbe gogo po moŋ, sopte faranŋ nurde tebaŋ teŋ hinhan. ¹⁷Ga dineŋ hime gabe det nuneŋ hinhan gwahade goyen sopte nunnayiŋ yeŋ ma dineŋ hime. Gwaha titneŋbe deŋ beleŋ mata gwaha teŋ hinhan gote muruŋgem Al Kuruŋ beleŋ dunwoŋ yeŋ nurdeb gago dineŋ hime. ¹⁸Goyenbe ne beleŋ deŋ ge teŋ meteŋ teŋ hinhem goke sopte wol heŋ faranŋ nurtek yeŋ nurde haŋ kenem ep faranŋ nuraŋ yeŋ nurde hime. Nebe detne epte hinhan. Gega deŋ beleŋ Epafroditus hulyaŋ irke yawaŋ nunuŋ gore irkeb budam wor po haŋ. Niŋgeb det gobe det hamiŋeŋ kusamuŋ kura Al Kuruŋ galak irke igiŋ yeneŋ amaŋ heŋ hiyen go gwahade goyen yara nurde hime. ¹⁹Niŋgeb nere Al Kuruŋ tareŋmiŋ turuŋ yaŋ detmiŋ epte wor po hi al gore deŋ beleŋ det niŋ nurde haŋ kuruŋ goyen Yesu Kristu niŋ teŋbe dunke ep wor po henayiŋ. ²⁰Niŋgeb Nanniniŋ, Al Kuruŋ hugineŋ hugineŋ turuŋ irde hitek! Fudinde wor po.

²¹Be, Al Kuruŋyen alya bereya Yesu Kristuya haŋ mar goyen goke dufay heŋ himyen geb, goke momoŋ yirtiŋ ala tinayiŋ. Irde kadne yago neya gar hite gare wor deŋ ge dufay heŋ haŋ goyen momoŋ yirayiŋ ninan geb, gago dineŋ hime. ²²Irdeb Al Kuruŋyen alya bereya gar haŋ gare wor tumŋaŋ deŋ ge yeŋ haŋ. Roma gabmanyen doyaŋ al kuruŋ Sisaryen meteŋ mar kura Yesu gama irde haŋ gore wor deŋ ge dufay heŋ haŋ geb, gago bebak dirde hime.

²³Be, Doyaŋ Al Kuruŋ Yesu Kristu beleŋ hugineŋ buniŋeŋ dirde igiŋ igiŋ dirde hiyeŋ. Fudinde wor po.